

МЕСЯЦА ЯНВАРЯ В 4ЫЙ ДЕНЬ.

ПРЕДПРАЗДНСТВО ПРОСВЕЩЕНИЯ, И СОБОР СВЯТЫХ СЕДМИДЕСЯТИ АПОСТОЛ, И ПРЕПОДОБНАГО ОТЦА НАШЕГО ФЕОКТИСТА ИГУМЕНА, ИЖЕ В КУКУМЕ СИКЕЛИЙСТЕМ

НА ВЕЧЕРНИ

Стихологисуем Блажен муж: 1-й антифон.

На Господи, возвах: стихиры на 6, 3 глас 4.

Подобен: Дал еси знамение:

Клеопу, Андроника, * Силуана же и Агава, * Ананию и Филиппа, * Прохора, Никанора * Руфа и Сосфена, * Лина же и Стахия, Стефана, Тимона, * Ерма, Флегонта, Марка, Луку, * Сосипатра, Иассона и Гаия, * и Тихика, и Филимона * священными песньми, вернии, ублажим.

Наркисс и Трофим, * Кесарь, Зина и Аристарх, * Марк, Сила и Гай, * Ермий и Асинкрит, * Аполлос и Кифа, Клим и Иуст, * Куарт, Ераст, Лука, Онисифор, * Карп и Евод, Матфий и Иаков, * Урван и Аристовул, * Тихик и Аристарх * достойно да почтятся.

Пуда, Иродиона и Артему, * Филолога, Олимпия же и Родиона, * Апелла и Амплия, * Патрова и Марка, * Тертия и Фаддея, * Епенета чуднаго, * Ахаика же, Акилу, Лукия, Варнаву, * и Фуртуната, и Аполла славнаго, и Криспа * почтим, честныя Богопроповедники.

Ины 3 стихиры преподобнаго, глас 2.

Подобен: Егда от Древа:

Егда уязвил еси душу * желанием Божественным, всеблаженне, * радуяся, взял еси твой крест, * и последовал еси Христу, * и, умертвив мудрование плотское воздержанием, * Духа действо живо восприял еси, * решити недугов зиму * теплотою молитв твоих Богоприятных, * темже ты согласно ублажаем.

Егда прилежными молитвами * и твердейшим пощением * зрительное души, отче, очистил еси, * храм был еси Трисолнечнаго Божества * и, священства помазание Божественное святое приим, * внутрь невходных вшел еси, * закаляя тебе ради Заклавшагося, * ради спешствия неизглаголаннаго.

Кроток, незлобив явлься, * в целости нрава, отче Феоктисте, * наследовал еси кротких воистинну землю * и, причастием обожаемь, * пици наслаждаешься, * и радости, и веселия истиннаго, * идеже поминая не престай искренно ты почитающих * и твое совершающих Божественное усение.

Слава, и ныне, глас 3:

Ясен убо мимошедший праздник, * славнейший же настоящий день: * во он Спасу волсви поклонившася, * в сей же Владыку раб славен крести. * Тамо пастырие свирающе, * видевшие и чудяхуся, * zde же глас Отчий Единороднаго Сына пропева.

На стиховне стихиры, глас 8.

Подобен: Мученицы Твои, Господи:

Сый Огнь нестерпимый, * брению и сему мне суцу, Христе мой, * что святую Твою преклоняеши главу, * еяже Ангельская трепещут множества? - * рече Иоанн ко

Творцу, егда креститися прииде. * Велико Твое есть, Благоутробне Жизнодавче, низшествие.

Стих: Сего ради помянух Тя * от земли Иордански и Ермониимски.

Се Просвещение наше, * Избавление, Спасение, * хотя, предгрядет на Иордане обнажится яве * и одяется, яко ризою, водами, * обнажение одевая всех, * обнажшихся змия советом сопротивным.

Стих: Видеша Тя воды, Боже, * видеша Тя воды и убояшася.

Огнь нестерпимый воистинну, * хотя, предгрядет ко Иордану * очистити мя, сокрушеннаго преступлением лукавым, * дождь Небесный приемлет, * посреди вод омыти мя от скверны многих моих прегрешений, * яко Щедр и Многомилостив.

Слава, и ныне, глас 6:

Грядет ко Иордану Христос Истина * креститися от Иоанна, * и рече к Нему: * аз требую от Тебе креститися. * И Ты ли грядеши ко мне? * Не смею, сено, прикоснуться Огню: * Ты мя освяти, Владыко, * Божественным явлением Твоим.

Тропарь, глас 3:

Апостоли святии, * молити Милостиваго Бога, * да прегрешений оставление * подаст душам нашим.

Слава, и ныне, предпразднства глас 4:

Готовися, Завулоне, * и красуйся, Неффалиме, * Иордане реко, стани, * подыми, възырая, креститися грядуща Владыку. * Веселися, Адаме с праматерию, * не крыита себе, якоже в раи прежде, * ибо, наги видеви вы, явися, * да облечет в первую одежду: * Христос явися, всю тварь хотя обновити.

НА ПОВЕЧЕРИИ

Канон, егоже краегранесие: Великаго четвѣрка долгую песнь пою. Глас 6: Ирмосы по дважды, тропари на 6. Таже ирмос, оба лика вкупе.

Песнь 1

Ирмос: Сеченое сечется море Чермное, * волнопитаемая же иссушается глубина, * таяжде купно безоружным бывши проходима и всеоружным гроб. * Песнь же Богокрасная воспевашеся: * славно прославися Христос, Бог наш.

Всевиновная и подательная жизни, безмерная мудрость Божия созда храм себе из Чистыя Неискусомужныя Матере, ко Иорданским же ныне струям грядет, обогащая Божеством земных на обновление.

Тайноводствующи, вся созывает, сущия от язык, Божия мудрость к Свету, во тьме прежде неведения неслетлой лежащи, в познание Истины возводящи, к Свету Крещением, сердца очищающим и созидающим Духом.

Да послушаем ныне пророческих, совершаемых Духом гласов: крещай бо в Дусе и Огни, идет Христос ко Иордану. Приидите к Нему и просветитесь, ваща бо лица не постыдятся.

Песнь 3

Ирмос: Господь Сый всех и Зиждитель Бог, * созданное Безстрастный, обнищав, Себе соединил еси * и струями, имиже хотел еси приити, * Сам Сый людем провозглашал еси: * воду Жизни почерпите * и верою утвердитесь.

Решительную душ и телес купно Крещения благодать, Спасе, грядеши даровати, сего ради подаваеши ныне нам и благодать вместо благодати, зовый: воду Жизни почерпите и верою утвердитесь.

Безумен муж, неведый Бога, растлеваеся, ибо безместными начинаньми лишается от всякаго блага и всякаго отпадает спасения, егоже части вси, Христа ведящи, да избавимся.

Песнь 4

Ирмос: Провидя пророк * тайны Твоя неизреченное, Христе, провозгласи: * положил еси крепкую Крещения благодать * верою сие приемлющим всем * во избавление грехов наших.

На Крещение тцаяся, смертным источающее оставление, обремененныя вся прегрешеньми зовещи, зле в нечистоте пожившия, душевный покой тем, яко Щедр, подати обещава.

Причащайся плоти моеи, да Твоего Божества подаси ми: образ бо неизменен сый Твоего Отца, вмещаеши под руки Твоего, Спасе, создания, кроме греха Человек явлься, подобным очищая, Слово, подобное.

Питие, и помазание, и Дух Твоя печати, Спасе, познания, и тайная дарования, и даров Божественных досторачительная дела, ибо Единороднаго Тя очищение Отец в мир посла.

Песнь 5

Ирмос: Союзом боязни содержимь ныне, Предтеча * отрицается крестити, * благоговейно Христа виде, нага стояща на воде, * водою покрывающаго превыспрення.

Неодержимую держащая и превыспреннюю на воздухе воду, бездны обуздающая и моря востязующая, Божия Мудрость грядет ко Иордану, Крещение приемля от руки раба.

Вообразив человеческое естество, Крещением ныне грядет очистить Христос, облаки Небо облагая и одевайся светом наг зрится во Иорданских струях, и рукою держится вся носяй.

Песнь 6

Ирмос: Бездна последняя грехов обыде мя, * и, волнения не ктому терпя, * яко Иона Владыце, вопию Ти: * от тли мя возведи.

Господа Тя ведяще, Небеса поведают земли Твою, Спасе, славу в Твоем рождестве, ныне же Отец Тя проповедует, Сына возлюбленна, крещаемого.

Скверну всяк носяй да омыет ю слезными каплями и Христу с трепетом да приступит, огнем и Духом Божественным очистить идущему естество наше.

Песнь 7

Ирмос: Отроцы в Вавилоне пещнаго пламене не убояшася, *но, посреде пламене ввержени, орошаеми, пояху: * благословен еси, Господи, Боже отец наших.

Помавая главою ко вражде, никтоже лестно да движет, искреннему зло воздати зле вместо зла поучаяся, но в любви Господа явльшагося да почествим.

Вы, Христовы яко друзи, мало спостраждите воображшемся, и грядущему Крещению прияти, и явльшемся по нам образа на очищение и прегрешений на избавление.

Со Мною аще кто снидет и спогребется Крещением, со Мною славы насладится и воскресения,— Христос ныне возвещает, Егоже верно да усрящим.

Песнь 8

Ирмос: За законы отеческия * блаженнии в Вавилоне юноши предбедствующе, * царюющаго оплеваша повеление безумное * и, совокуплени, имже не сварипшася огнем, * Державствующему достойную воспеваху песнь: * Господа пойте, дела, * и превозносите во вся веки.

Гостителие, Божия пищи в Вифлееме мудре напитавшеся, со Ангелы же прославльше, и пастырьми, и волхвы Воплощшагося, ныне же ко Иордану таинственно идем, видяще таинство велие, еже Христос Сам совершает, Егоже превозносим во вся веки.

Закона соблюдающе главизну и пророк, любовию утверждшеся, подобницы Христа будем, за любовь крайнюю плоть приемшаго, и Крещением нас Отцу примирившаго, и научившаго пети: Господа пойте, дела, и превозносите во вся веки.

Примамше Грядущаго грехи мира очистить водою, но Сему возбраняше, сопрятуемь страхом: аз бо требую креститься от Тебе,— Жениху противорече друг, глас же Слову и Солнцу светильник. Тя превозносим во вся веки.

Песнь 9

Ирмос: Странствия Владычня * и бессмертныя трапезы * во убозем вертепе прежде насладившеся, ныне на Иордан тецем, * тайну зряще странну, * Горния светлости ходатайственну.

Идите от Вифлеема, питомицы чудес, к стране Иорданстей и тамо видите дела, таинственно совершаема Крещением же Христа, пришедша Адама обновити, ибо воплотися.

Содетель, рождся из Отца прежде веков, родися, напоследок непреложно воплощся из Девы Чистыя Богоотроковицы, сугуб, Бог и Человек пребывая, Адама обновити Крещением.

Яко Человек пришел еси существом, не мечтанием, яко Един посреди всех, просяй Крещения, Един, естеством неповинный, погрести бо вины пришел еси человеческия, в водах крещаемь.

Таже ирмос: Странствия Владычня: И поклон.

НА УТРЕНИ

На Бог Господь: тропарь предпразднства, глас 4:

Готовися, Завулоне, * и красуйся, Неффалиме, * Иордане реко, стани, * подыми, възырая, креститися грядуща Владыку. * Веселися, Адаме с праматерию, * не крйта себе, якоже в раи прежде, * ибо, наги видеви вы, явися, * да облечет в первую одежду: * Христос явися, всю тварь хотя обновити. [Дважды]

Слава, апостолов, глас 3:

Апостоли святии, * молити Милостиваго Бога, * да прегрешений оставление * подаст душам нашим.

И ныне, предпразднства.

По 1-й стихологии седален, глас 4.

Подобен: Скоро предвари:

Се приходит ко Иордану Христос, * приглашает же Предтечу: гряди и крести верно * весь очищающаго мира грех речными струями, * простри твою руку к верху Моему Божественному, * руки бо прегрешение приидох исцелити.

Слава, и ныне, глас тойже:

Подобен: Вознесыйся:

Царя всех и Владыку на Крещение, вернии, зряще, боголепно грядуща, воспоим Его, * стези сердец наших уготуем любовию, скверны отмывающе лютых прегрешений: * се бо спасти род человеческий на Иорданския струи приходит.

По 2-й стихологии седален, глас 8.

Подобен: Воскресе:

Великий Крестителю Господень, радуйся! * Прииде бо Христос от Тебе креститися. * Трепещи, яко служитель, Владыка бо главу преклоняет тебе, * прикоснися Божественному верху содержащаго рукою всяческая * и благоволением спасающаго Бога род человеческий.

Слава, и ныне, глас тойже:

Торжество светлое предсвершающе вси Просвещения Христова, * добродетельми облистаетеся: * приходит бо Иже над всеми от Галилеи ко Иоанну * Крещение источити спасения огнем Духа * во Иорданских струях, яко Бог, роду человеческому.

Каноны предпразднства со ирмосом на 6, апостолов на 4, и преподобнаго на 4.

Канон Предпразднства, егоже краегранесие по алфавиту, глас 6.

Песнь 1

Ирмос: Яко по суху, пешествовав Израиль * по бездне стопами, * гонителя фараона видя потопляема, * Богу победную песнь поим, вопияше.

Да радуется тварь, отечествия языков да поют: Иисус, Царь всея земли, предгрядет струями Иорданскими наше сотворити очищение.

В царскую багряницу из девственных кровей, Господи, одеявся плотию, к речным течением наг приходиши, мою одевая наготу.

Сын Отца Пребезначального Ты сый, к сыну, Благоутробне, Захариину смиренно приходиши, Крещения прося, яко да благодатию сыны Божия сотвориши ны.

Ин канон апостолов, егоже краегранесие: Христовы ученики вторыя да похвалю. **Иосиф, глас 4.**

Песнь 1

Ирмос: Отверзу уста моя, * и наполнятся духа, * и слово отрыгну Царице Матери, * и явлюся, светло торжествуя, * и воспою, радуяся, Тоя чудеса.

Христовы ученицы бывше, нас ради вещью телесною Явльшагося, всехвальнии, просветисте мир весь зарею благочестия, тьму разоривше безбожия.

Тленных оставльше оскверненное и нестойное, Христу последоваша Крисп, и Прохор, и Андроник, Фаддей и Никанор, светильницы бывше Боговиднейшии.

Крепость губителя победисте, славнии, крепостию Духа, неистовством же безбожия конечно ослабленные крепости исполните и Божественного разумения.

Плоти подобием явльшагося Господа Амплий проповеда, Стахий и Филипп, яко апостоли, яко Божественнии иерарси, яко воистинну служителие сущих паче ума.

Богородичен: Божественную Палату Цареву почтим, в Нюже вселися, якоже восхоте, Неискусомужную и Едину Богородицу, Еяже ради обожихомся, воспеснословим.

Ин канон преподобнаго, глас 2.

Песнь 1

Ирмос: Во глубине поста иногда * фараонитское всеоинство преоруженная сила, * воплощсея же Слово всезлюбный грех потребило есть: * препрославленный Господь славно бо прославися.

Сладости Поток, Христос, к водам приходит раболепно Иорданским омытися. Горы, възграйте радостию, холми, препояштитеся, оскверненнии, ко очищению Божественному уготовитесь.

Светоносная память твоя нам днесь возсия солнечныя лучи, Феоктисте, исправлений твоих, страстей убо наших отгонящи облак, юже совершающе, верою ты и любовию блажим.

Вперився любовию Христовою, был еси вышший, мирскаго отступив смущения, темже отлучився к постничества болезненным трудом и воздержанием, якоже Ангел, пожил еси.

Богородичен: Чистую чистым умом, приидите, ублажим, Доброту Иаковлю, Юже возлюби Бог, избрав, в Нюже вселися, яко скинию священия, яко Честнейшую всех тварей воспоим.

Песнь 3

Ирмос: Несть свят, * якоже Ты, Господи Боже мой, * вознесый рог верных Твоих, Блаже, * и утвердивый нас на камени * исповедания Твоего.

Владычествуяй всеми яко Бог, раба носиши образ и к рабу, Щедре, приходиши плотски, Крещением Богодельным от работы вражия изымая ны.

Пришел еси на струи, чесо ради? Кое очищение хотя? Кую скверну отмыти, Преблагий, ищай? Пою Твое, еже паче ума, за милосердие, Слове, низхождение.

Ища овча, Христе, еже дивий волк расторгне лестию, на Иорданских струях стоиши, взывая Предтечи: гряди, крести Мя ты.

Ин. Апостолов

Ирмос: Твоя песнословцы, Богородице, * живой и независтный Источниче, * лик себе совокупльшия, духовно утверди, * в Божественней Твоей славе * венцев славы сподоби.

Якоже реки, вас Слово посла во всю землю, наполняющия сию, всемудрии, напоении Божественнаго Духа и пламень отъемлющия безбожия благодатию.

Воспоим Тимона Божественнаго, Силу же и Силуана и верою восхвалим Епенета славнаго, и Урвана, и Агава, истинныя Христопроповедники.

Блажени уже бывше, яко истинно блаженнаго Бога Учителя стяжавше, иже первее окаянныя, всемудрии, причастники покажете Божественнаго блаженства.

Богородичен: Чиста прежде рожества, и в рожестве, и по рожестве воистинну Дева, Мати, была еси: Бога бо породила еси, Егоже апостолов сословие пресветло проповеда.

Ин. Преподобнаго

Ирмос: На камени мя веры утвердив, * расширил еси уста моя на враги моя, * возвеселибоя дух мой, вегда пети: * несть свят, якоже Бог нац, * и несть праведен, паче Тебе, Господи.

Бездны повелением Сотворивый, водами Покрываяй превыспренняя в водах предгрядет креститися. Душе, бодрствуй, от страстей очистися, добродетелей приносящи прозябения.

Яко шипок сладковонен, деланием Духа во цветнице пощения процвел еси, Феоктисте, благоухания исполняяй Божественнаго поющия всегда: яко несть свят, паче Тебе, Господи.

Яко маслина плодовита, в дому Господни прозябл еси, елеем трудов твоих, Феоктисте, умащая наша лица, поющих, преподобне: яко несть свят, паче Тебе, Господи.

Богородичен: Мнози, борющии мя от высоты, в болезни оскуде жизнь моя, понрох в пропасть прегрешений. Спаси мя, Владычице, не презри мене, Предстательницу бо Тя непобедну имам.

Кондак предпразднства, глас 4

Подобен: Явился еси:

Во струях днесь Иорданских быв, Господь * Иоанну вопиет: * не убойся крестити Мя, * Спасти бо приидох * Адама первозданнаго.

Икос: Не истязую тя, Крестителю, пределы преходити, не глаголю тебе: рцы Ми, яже глаголеши беззаконным и учиши грешники. Точию крести Мя молча и чая, яже от Крещения, примеш бо сего ради достоинство, еже не бысть Ангелом, ибо всех пророков больша ты сотворю. От оных убо ни един яве Мя виде, но во образех, и сенех, и гаданиих, ты же пред тобою стояща видел еси, спасти бо приидох Адама первозданнаго.

Слава, преподобнаго, глас 1.

Подобен: Камени запечатану:

Упас Богоугодно Господню паству свирелию слова, * Богоносе Феоктисте, * на пажити безстрастия и жизни привел еси, спасаемую, Богу * и, к Сему отпед, мзду трудов приял еси достойную. * Слава Давшему тебе крепость, * слава Венчавшему тя, * слава Действующему тобою всем исцеления.

И ныне, глас и подобен тойже:

Иисусу рождшуся от Девы Марии * и во Иордане крещшуся от Иоанна, * Дух сниде на Него, зримый в виде голубине. * Сего ради пророк со Ангелы глаголаше, зовый: * слава пришествию Твоему, Христе, * слава Царствию Твоему, * слава смотрению Твоему, Едине Человеколюбче.

Песнь 4

Ирмос: Христос моя сила, * Бог и Господь, честная Церковь * боголепно поет, зывающи, * от смысла чиста о Господе празднующи.

Егда виде Тя, струя, Господи, Иорданская возвратися; многими же страстьми низложенное естество наше к Небесем обратися, поклонився Тебе.

Ужасается солнце, зря Тебе, Солнца, плотски обнажшася и таинственно все озаряюща, обнажшееся мрачным преступлением естество, Владыко.

Се Очищение, се Избавление и Обновление всех, Просвещение прииде во своя, да присвоимся убо Ему жития чистотою.

Ин. Апостолов

Ирмос: Незследный Божий совет, * еже от Девы, воплощения Тебе, Вышняго, * пророк Аввакум усмотря, зовяше: * слава силе Твоей, Господи.

Море возмутиша языческое, в сие вшедше, всемудрии, якоже кони, Спасовы ученицы и верныя спасоша водою святою и Духом.

Облисташа, яко солнце на земли, Пуд, Апеллий и Филолог, и Иродион, Руф же и Патров и верныя просветиша, от тьмы неведения избавльше.

Напряг, посла стрелы вы яко изошренны Благоутробный, стрелы, сокрушающия вражия и люте уязвленные, славнии, благодатию Божию исцеляющия.

Хвалу принесем Избавителю, песнословяще Родиона Богоглаголиваго, и Ермия славнаго, и мудраго Асинкрита, Лина же Божественнаго и Гаия.

Богородичен: Тя блаженнейший древле лик пророчествующих Духом Богоглаголании священными боголепно именует, Всечистая, дверь же и гору приосененную.

Ин. Преподобного

Ирмос: Пришел еси от Девы, не ходатай, ни Ангел, * но Сам, Господи, воплощся, * и спасл еси всего мя, человека. * Тем зову Ти: слава силе Твоей, Господи.

Искапаша сладость болезней потове твои, горесть отъемлюще демонскую, славне, недуги отгоняще славныя окроплением, досточудне.

Обожаемь непрестанными очищении, преподобне, светильник был еси монашествующих светлейший, образ известнейший, и наставник, и столп непоколебим.

Расторгл еси страстей моря, Феоктисте, жезлом веры и, фараона невидимаго, отче, потопив, ко обетованней земли достигл еси, преподобне.

Богородичен: Воззову в нощи и во дни, Всенепорочная, к Тебе, и спасуся, и сластей преиду стену, и избавлюся искушений демонских ходатайством Твоим.

Песнь 5

Ирмос: Божиим светом твоим, Блаже, * утренюющих Ти души любовию озари, молюся, * Тя ведети, Слове Божий, * Истиннаго Бога, * от мрака греховнаго зывающа.

Плодопринесем Христу житие чистое: грядет бо Очищаяй водами грехов скверну благодатию, Един Благодетель и Безгрешный.

Людие, во тьме скорбей древле седящии, Свет явися вам незаходящий, видите, и Божественными зарями просветитесь, и Явльшагося благодать воспойте.

Велие таинство совершая, к великому Предтечи Твоему, о Великодаровите Господи, грядеши, умалившееся человечество неизглаголанно величая Крещением.

Ин. Апостолов

Ирмос: Ужасошася всяческая * о Божественной славе Твоей: * Ты бо, Неискусобрачная Дево, * имела еси во утробе над всеми Бога * и родила еси Безлетнаго Сына, * всем воспевающим Тя * мир подавающая.

Вязати же, всехвальнии, и решити яко апостоли приемше вы власть, связанный зловерия узами разрешисте, темже вашу память празднуем, верно ликующе.

Божественными Аристарх да почитится песнопеньми, Тертый, Иассон и Сосфен, Кесарь и Марк, Лука, Сосипатр, Куарт и Божественный Апеллий, Клим и Епафродит и всемудрый Ераст.

Вас, яко дванадесять, посла Господь, все искореняющия безбожие, всем человеком насаждающия знание Божественное светло, славнии апостоли, молитвенницы о душах наших.

Богородичен: Очи просвети, Дево, сердца моего, осияй ми зарю покаяния, тьмы мя избави вечнующия, дворе Света, христиан всех Прибежище, верно воспевающих Тя.

Ин. Преподобнаго

Ирмос: Просвещение во тьме лежащих, * спасение отчаянных, Христе Спасе мой, * к Тебе утренюю, Царю мира, просвети мя сиянием Твоим; * иного бо, разве Тебе, бога не знаю.

Молитв ралом обновив землю сердца сию насял еси Слова семенем, отче Богомудре, и клас пожал еси благоплодия, восхваляющих тя всех благочестивых души питающий.

Бодр ум всегда приноси, отче Богомудре, страсти успил еси душетленные, к Божественному утру тцася достигнути, к незаходимаго Света светлости, веселящихся в немже есть жилище.

Яко светозарный и светоносец и полн дарований Духа Божественнаго сый, отче, незлобия чист обычай являя, всем показовался еси, якоже Ангел живой с телом.

Богородичен: С высоты востока явльшагося показалася еси дверь и престол превознесен Царев, Небомерная и высокая лествица, на нюже взыде Христос, Пречистая, и отриновенным человеком приобщися.

Песнь 6

Ирмос: Житейское море * воздвигаемое зря напастей бурею, * к тихому пристанищу Твоему притек, вопию Ти; * возведи от тли живот мой, * Многомилостиве.

Вод сый исполнен тайных, яко река мира, Едины Господи, к реце пришел еси, от малыя капли прося креститися, Едины Безгрешне.

Дивится свыше Ангельский лик, смотря обнажена облаки покрывающаго Небо, и взывает: что сие Твое многое к человеку низшествие?

Полный истоцися, Невидимый се, воплощся, явися. Иордане реко, возвеселися, струи твоя исполни, яко да омыеши всех Возрождение.

Ин. Апостолов

Ирмос: Божественное сие и всечестное * совершающе празднество, * Богомудрии Богоматере, * приидите, руками воспещим, * от Нея рождашася Бога славим.

В весь мир кропите воду жизни спасительную, облацы одушевленнии явльшися, апостоли, и верных сердца оросите.

Глагол Божественных сила ваша риторов победи многую лютость и немудрыя умудри, объюродевшия разумом прелести, всемудрии.

Божественный Пуд и Трофим, Филимон славный и Аристарх, Онисифор же и Тихик всеизряднейший, яко ученицы Слова да возвеличатся.

Богородичен: Пою Тя, Едины Всепетая, славлю Тя, присно Богославная, и блажу Тя, Юже роди блажат родов, Дево Богоблаженная.

Ин. Преподобнаго

Ирмос: В бездне греховней валяся, * неизследную милосердия Твоего призываю бездну: * от тли, Боже, мя возведи.

В рабий зрак одеаяся, грядет к рабу Христос, прося Крещения, порабощенныя страстьми свободны показуя благодатию.

Лукавствия покорил еси духи, Духа Святаго явився сосуд, силу тебе вдохнувшаго, Богоносе всеблаженне Феоктисте.

Словесною палицею твоею, преподобне, на пажити постничества, отче, воспитал еси словесную твою паству и ко ограде Небесней направил еси.

Богородичен: Небо прострый мановением иное на земли Небо Тя показа, Богородительнице Непорочная, и из Тебе сущим во тьме явися.

Кондак апостолов, глас 2.

Подобен: Вышних ища:

Христовых учеников лик семьдесят * Божественно, вернии, в песнях восхвалим, * теми бо вси навыкохом Троицу почитати Нераздельную, * и пребывают светильницы Божественныя веры.

Икос: Семьдесяти апостолов лик согласно, вернии, священными песнопеньми да восхвалим: Стефана, Прохора же, и Силу, и Никанора, Тимона, и Амплия и Пармена, Апеллия же, Иакова, Филиппа, Аристарха, и Марка, и Матфия, и Иродиона, Крискена и Флегонта, Варнаву, Лина и Олимпа, Ананию, Луку и Асинкрита и прочия, пребывают бо светильницы Божественныя веры.

Песнь 7

Ирмос: Росодательну убо пещь содела Ангел * преподобным отроком, * халдеи же опаляющее * веление Божие мучителя увеща вопити: * благословен еси. Боже отец наших.

Како Тя струи подымут речныя, сладости суща потока, Христе? Како Предтеча прострет руку на Тя, рукою создавшего его и от руки лстиваго избавльшаго ны?

Струя, Господи сый, благи, ко струям Иорданским како приходиши, нетления водами ища напоити вкушением лукавым низложенныя во тлю завистию змия?

Да каплют горы радование, и холми да възграют, веселящися, реки да воспещут рукою: явися, грядет Христос в реце человеческая погрузити прегрешения.

Ин. Апостолов

Ирмос: Не послужиша твари Богомудри * паче Создавшаго, * но, огненное прещение мужески поправше, * радовахуся, поюще: * препетый отец Господь и Бог, благословен еси.

Уловивше словом, извлекосте из глубины безбожия языки многоразсеянные, знаменья и чудеса утвердивше мудрования сих, мудри апостоли, путевожди заблуждших.

Вшедше в пристанище тишайшее, волнующимся в мори лютых спасителие явистеся и правителие мудрии, воспевающе: отец Господь и Бог, благословен еси.

Вси Евода и Карпа ублажим, и Тихика, и Кифу, Иуста и Артему, Зину же славнаго, яко Христовы ученики, воспевающе: отец Господь и Бог, благословен еси.

Молниезрачнии Духом бывше, Христовы апостоли, одержимыя нощию неведения избависте и к Свету жизни настависте, вопиющия всегда: Боже, благословен еси.

Богородичен: Очистилице, Всенепорочная, была еси грешащих присно, рождши преестественно мира вземлющаго грех Христа, Емуже зовем: отец Господь и Бог, благословен еси.

Ин. Преподобнаго

Ирмос: Богопротивное веление * беззаконнующаго мучителя высок пламень вознесло есть, * Христос же простре Богочестивым отроком росу духовную, * Сый благословен и препрославлен.

Пустыня днесь Иорданова да процветет: грядет бо всех Избавление, огнем Божества погрузити нас водою и Духом, люте сокрушенных грехопаденьми.

Слез пролияньми погасил еси страстей разжжения, Феоктисте блаженне, чудес источил еси струи присноживотныя, имиже отмываются душ же и телес недуги, преславне.

Давидове кротости, отче, поревновал еси, стяжав непорочно Иовлево безстрастие, Иаковлю простоту и веру Авраамову, Петрову теплоту. С нимиже вселився, нас поминай.

Богородичен: Жизнь Ипостасную нам рождши, смертию смерть, Дево, упразднившую, лютыми обуреваньми умерщвлена мя оживи мольбами Твоими, Чистая, Благословенная и Препрославленная.

Песнь 8

Ирмос: Из пламене преподобным росу источил еси * и праведнаго жертву водою попалил еси: * вся бо твориши, Христе, токмо еже хотети. * Тя превозносим во вся веки.

Речныя струи милотию разсекаше Елисей, благодать Крещения предсеннопища, юже Христос соделает, на сия восходя, Един Благодетель.

Назнаменоваше иногда пророк славный Крещения благодать, солию воды бесплодныя первее соделав многоплодны, явльшагося Бога нашего силою.

Дебрь всяка Божественных даров исполнится, и холм противный смирится, и стропотная в правая обратятся воплощеннаго Бога явлением.

Ин. Апостолов

Ирмос: Отроки благочестивыя в печи * Рождество Богородичо спасло есть, * тогда убо образуемое, * ныне же действуемое, * вселенную всю воздвизает пети Тебе: * Господа пойте, дела, * и превозносите Его во вся веки.

Обновльше разумы ояденевшия ралом Слова, всеславнии, и в них спасительная семена насеясте, и благочестия клас сторичный пожасте – спасшихся множество, Господни апостоли все мудрии.

Похвалами Иакова Божественными, Клеопу, Варнаву же и Стефана, Наркисса всеумдраго, Марка, Аристовула и Апеллия почтим, апостоли Христовы, вопиюще: Господа пойте, дела, и превозносите во вся веки.

Крест вместо броня носяще, ко всем мужески ополчистесь полком змия, всеумдрии апостоли, и, тыя погубивше, яже плени человеки, уловисте верою, и Жизнодавцу приведосте Владыце.

Богородичен: О, чудо вышше чудес! Како раждаеши и пребываеши девствующи, Всечистая Богоневесто? Слово бо родила еси, Отцу Собезначальное, Емуже вси поем: Господа пойте, дела, и превозносите во вся веки.

Ин. Преподобнаго

Ирмос: В печь огненную ко отроком еврейским снизшедшаго * и пламень в росу предложшаго Бога, * пойте, дела, яко Господа, * и превозносите во вся веки.

Просвещение и очищение душ явился еси на Иордане, источник, Спасе, мудрости: воды живы пищный поток подавая нам, водами погружаеши наша грехи.

В незлобии жизнь препроводив воистинну, Богомудре отче, вражию злобу совершеннейшим умом низложил еси, пойте,– вопия,– дела вся, Господа и превозносите Его во веки.

Ныне секира душам претит посечение, душе моя, потщися и, страстей терния отсекиши, плоды зрелы Господу принеси, Богоноснаго молитвами спасающися.

Богородичен: От всех Тя родов избра Христос в жилище Себе, Богородице, обновляя ны, истлевшия, соединением лучший, тем Тя поем во вся веки.

Песнь 9

Ирмос: Бога человеком невозможно видети, * на Негоже не смеют чини Ангельстии взирати. * Тобою же, Всечистая, явися человеком Слово воплощенно, * Егоже величающе, * с Небесными вои Тя ублажаем.

Руками создавший, Христе, человека, под руку Предтечеву подклоняешься, яко Человек смиряся, яко да возвысиши мя, древле смирившася и погибша. Слава славному и страшному строению Твоему.

Душ очищение готовится, просвещение, решение лютых прииде. Иордане реко, возвеселися, возликуй, вся тварь, земля же и море, восплеци, славящи Христа Преплагаго.

Яко Сый всех добрых исполнение, грядеши, вопия, исполненному святыни рабу Твоему, удивльшуся Твоему снизхождению: приближися, крести Мя, хочу бо исполнити естество земных освящения и очищения.

Ин. Апостолов

Ирмос: Всяк земнородный * да възиграется, Духом просвещаемъ, * да торжествует же Безплотных умов естество, * почитающее священное торжество Богоматере, * и да вопиет: * радуйся, Всеблаженная Богородице, * Чистая Приснодево.

Исцели наша, Христе, сокрушения сердечная молитвами возлюбивших Тя и проповедавших во всех языцех Бога купно и Господа, Содетеля всех, и идольское все омрачение отгнавших светом проповедания.

Якоже молния, мир осветиша Лука вкупе и Ерм, Марк и Анания и с Матфием священный Олимп и верных исполнение яве просветиша, яже верою днесь почитим священными и честными песнопеньми.

Станем благоговейно в дому Бога нашего и ублажим священнопроповедники и учителя, и Ангеломудрыя, и богатители, спасители же, и защитники, и предстатели всех сущия, чтущих их памяти.

Озаришася Светом невещественным Духа Акила, Ахаик, Лукий славный и Фуртунат с шестидесять и шестию Христовыми угодниками и священными учениками и сердца всех озаряют светоносную их памятью днесь.

Богородичен: Сияние блистания Рождества Твоего просия, и уясни всю подсолнечную, и предстателя тьмы погуби, Богородительнице Всечистая, Ангелов хвало и человеков всех спасение, непрестанными гласы восхваляющих Тя.

Ин. Преподобнаго

Ирмос: Безначальна Родителя Сын, Бог и Господь, * воплощся от Девы, нам явися, * омраченныя осветити, собрати расточенная, * тем Всепетую Богородицу величаем.

Божие здание был еси, Феоктисте, чистое, не сквернив души твоя доброты, преподобне, грехов калом, но тебе самага всего украсил еси добрыми поданими, сего ради тя почитаем.

Добродетельми украшен, любовию просвещаемъ, добрых виды облистамъ, к твоим преставился еси отцем, отче мудре, в старости маститей якоже пшеница зрела, в сокровищах Божественных блюдом.

Паства твоя днесь ликует, празднующи светоносную память твоего успения, юже благословя с Небесе и по преставлении не престай, преблаженне, Богу предстоя со Ангелы, всеблаженне.

Богородичен: Жизнь рождающая земным на избавление, умершую, Дево, прегрешеньми оживи, Чистая, душу мою, яко сострадательна, яко Единая Предстательница прибегающих в Твою кров, Всенепорочная.

Светилен апостолов.

Подобен: Жены, услышите:

Апостоли всехвальнии Христа всецедраго, и ученицы, и Боговидцы, * не премолчите, моляще о нас, любовию вашу память совершающих, * да прегрешений оставление и Божественную обрящем благодать в День Суда.

Слава, и ныне, предпразднства.

Подобен: Посетил ны:

Готовися, Завулоне, * Неффалиме, украсися, * подыми, Иордане, Зиждителя всех и Бога, плотию к тебе грядуща, * наша грехи измыти хотящаго.

На хвалитех стихиры, на 4, глас 6.

Подобен: Ангельския:

Егоже глас вопиющаго предъявляше, * прииде Христос на струи Иорданския * и Предтечи рече: * гряди, омый Мя водами, * крести Мя, ныне снизшедшаго, * Адама бо омыти приидох от первого падения. * Благословен, явлейся Боже наш, слава Тебе.

Высоты Небесныя никакоже изследих, * звезд число, ниже землю измерих, * и како верху Твоему, - * Владыце Предтеча рече, - коснуса рукою? * Како же крещу Носящаго горстию тварь? * Темже зову Ти: * благословен, явлейся Боже наш, слава Тебе.

Сопрестолен Отцу и Духу Сый, * Ангельскими воинствы дориношуся, * но в малем вертепе, странствуя, * родихся в Вифлееме за благоутробие. * Темже и ныне десницу твою Мне взаимствуй, * да отмыю во Мне мира прегрешения.

Потопил еси иногда грех при Нои, * словом разверзый хляби Небесныя, * и како Тя Иордан виде, стерпит? * уже бо струю отвратит. * Позна Тя тварь вся, * и аз зову Тебе: * благословен, явлейся Боже наш, слава Тебе.

Слава, глас и подобен тойже:

Да исполнится Отчее благоволение: * приидох на землю, одеявся в нищету, * Небо Мне престол, земля же подножие, * тебе же выю преклоняю, * на сие бо приидох, * Мене крести, * во Мне человек очищающа прегрешения.

И ныне, глас и подобен тойже:

Ты, Израиля столпом и облаком перее световодя * и орошая в пустыни, * Ты, владычествуй всеми, * естеством несказанный в рабий зрак како одеялся еси? * не прикоснуса Тебе, Огню сено: * Сам мя крести, * аз бо требую от Тебе очищение прияти.

Аще несть великаго славословия, на стиховне стихиры, глас 2.

Подобен: Доме Евфрафов:

Явися Отческое * озарение славы * на Иорданских струях, * Крещением очищающа * скверну душ наших.

Стих: Сего ради помянух Тя * от земли Иордански и Ермониимски.

Приими раболепно, * пророче Иоанне, * Избавителя мира * и крести Зиждителя * земных на возрождение.

Стих: Видеша Тя воды, Боже, * видеша Тя воды и убояшася.

Прииде Просвещение, * Избавление явися. * На Иордан приидите, * снидемся очиститися * и пети предпразднственная.

Слава, и ныне, глас и подобен тойже:

Днесь Христос * спасительное человеком * решение дарует, * душ очищая скверну * огнем Крещения.

НА ЛИТУРГИИ

Блаженны от канона предпразднства песнь 3-я и апостолов песнь 6-я.

Владычествуя всеми яко Бог, раба носиши образ и к рабу, Щедре, приходиши плотски, Крещением Богодельным от работы вражия изымая ны. [Дважды.]

Пришел еси на струи, чесо ради? Кое очищение хотя? Кую скверну отмыти, Преблагий, ищай? Пою Твое, еже паче ума, за милосердие, Слове, низхождение.

Ища овча, Христе, еже дивий волк расторгне лестию, на Иорданских струях стоиши, зывая Предтечи: гряди, крести Мя ты.

В весь мир кропите воду жизни спасительную, облацы одушевленнии явльшися, апостоли, и верных сердца оросисте.

Глагол Божественных сила ваша риторю победи мноую лютость и немудрыя умудри, обьюродевшия разумом прелести, всемудрии.

Слава: Божественный Пуд и Трофим, Филимон славный и Аристарх, Онисифор же и Тихик всеизряднейший, яко ученицы Слова да возвеличатся.

И ныне: Богородичен: Пою Тя, Едина Всепетая, славлю Тя, присно Богославная, и блажу Тя, Юже роди блажат родов, Дево Богоблаженная.

Тропарь апостолов, глас 3:

Апостоли святии, * молите Милостиваго Бога, * да прегрешений оставление * подаст душам нашим.

Тропарь предпразднства, глас 4:

Готовися, Завулоне, * и красуйся, Неффалиме, * Иордане реко, стани, * подыми, зыграя, креститися грядуща Владыку. * Веселися, Адаме с праматерию, * не крйта себе, якоже в раи прежде, * ибо, наги видеви, явися, * да облечет в первую одежду: * Христос явися, всю тварь хотя обновити.

Кондак апостолов, глас 2.

Христовых учеников лик седьдесят * Божественно, вернии, в песнех восхвалим, * теми бо вси навыкохом Троицу почитати Нераздельную, * и пребывают светильницы Божественныя веры.

Кондак предпразднства, глас 4

Во струях днесь Иорданских быв, Господь * Иоанну вопиет: * не убойся крестити Мя, * Спасти бо приидох * Адама первозданнаго.

Прокимен, глас 8: Во всю землю изыде вещание их * и в концы вселенныя глаголы их.

Стих: Небеса поведают славу Божию, * творение же руку Его возвещает твердь.

Апостол к Римляном, зачало 9б.

Братие, сущии во плоти Богу угодити не могут. Вы же несте во плоти, но в душе, понеже Дух Божии живет в вас. Аще же кто Духа Христова не имать, сей несть Его. Аще же Христос в вас, плоть убо мертва греха ради, дух же живет правды ради. Аще ли же Дух Воскресившаго Иисуса от мертвых живет в вас, Воздвигий Христа из

мертвых оживотворит и мертвенная телеса ваша, живущим Духом Его в вас. Темже убо, братие, должны есмы не плоти, еже по плоти жити. Аще бо по плоти живете, имате умрети, аще ли духом деяния плотская умерщвляет, живи будете. Елицы бо Духом Божиим водятся, сии суть сынове Божии.

Аллилуия, глас 1: Исповедят Небеса чудеса Твоя, Господи.

Евангелие от Луки, зачало 50.

Во время оно, яви Господь и инех седмьдесят ученик Своих, и посла их по двема пред лицом Своим во всяк град и место, аможе хотяше Сам ити. Глаголаше же к ним: жатва убо многа, делателей же мало, молитесь убо Господину жатве, да изведет делатели на жатву Свою. Идите, се Аз посылаю вы яко агнцы посреде волков. Не носите влагалища, ни пиры, ни сапог, и ни когоже на пути целуйте. В оньже аще дом внидете, первее глаголите: мир дому сему. И аще убо будет ту сын мира, почиет на нем мир ваш, аще ли же ни, к вам возвратится. В том же дому пребывайте, ядуще и пиюще, яже суть у них, достоин бо есть делатель мзды своя. Не преходите из дому в дом. И в оньже аще град входите, и приемлют вы, ядите предлагаемая вам, и изцелите недужныя, иже суть в нем, и глаголите им: приближися на вы Царствие Божие. И в оньже аще град входите, и не приемлют вас, изшедше на распутия его, рцйте: и прах, прилепший нам от града вашего, оттрясаем вам. Обаче сие ведите, яко приближися на вы Царствие Божие. Глаголю вам, яко Содомляном в день той отраднее будет, неже граду тому. Горе тебе, Хоразине, горе тебе, Вифсаидо, яко аще в Тире и Сидоне быша силы были бывшыя в ваю, древле убо во вретници и пепеле сядяще покаялися быша, обаче Тиру и Сидону отраднее будет на суде, неже вама. И ты, Капернауме, иже до небес вознесыйся, до ада низведешися.

Причастен: Во всю землю изыде вещание их * и в концы вселенныя глаголы их.